

Transkription von Urkunde HRO 1395c

Ort, Datierung: Rostock, 1395-11-12

Signatur: Stadtarchiv Rostock, U 630 U 630 Kloster Marienehe 1395 November 12 [\[online\]](#)

Inhalt: Ritter Mathias Axekowe: Quittung Gutsverkauf

Jk Her mathias axekowe Ridder . Bekenne vn(de) betüge openbare Jn desseme yeghenwardigen breue vor allen luden de ene zēn / vn(de) horen lesen . . dat ik na rade vn(de) mit vulbord geseken mýnes wýues de henneke wylden husvrowe hadde wesen deme god / gnade . vn(de) her hinric katzowen Radmans to Rozstok . vn(de) hans katzowen . Borgers dar zúlues erer brodere . vn(de) erer negesten eruen / vn(de) na Rade . vn(de) mit vulbord hern werners van axekowe , Ridders mynes vaders . vn(de) mýner brodere . vn(de) alle myner negesten eruen / Rekkelken . vn(de) Redelken vorkoft hebbe . vn(de) vorkope Jn desseme yegenwordigen breue . deme Erliken ma(n)ne . her wynold Baggelen . Bor=/germest(er)e to Rozstok . vn(de) sýnen rechten Eruen de ghantzen helfte des dorpes . vn(de) houes to mergne also id nu licht . vn(de) van oldinges / gelegen heft in allen enden sýner schede . mit aller nut . vn(de) tobehoringe . yegenwordich . vn(de) tokomende . vn(de) deme Richte . hogesten vnde / sydesten mit allem egendome . vn(de) herenrechte na lude der heren breue van me lande de dar vppe gheuen sint dar dat gud mede vore=/gent is . vn(de) also vrý also dat Gerlach wylde . vn(de) henneke Wýlde sýn sone guder dachtnisse . dar id mýme wýue geseken erben(omet) de / Henneke Wýlden wýf was to vorn van erflikem anvalle aneruet vn(de) togevallen is . ye vrýest gehad vn(de) bezeten hebben . brukelken to / hebbende . vn(de) tobezittende . sunder hinder vn(de) yenigerleye bewernisse . vs vn(de) vse eruen dar nicht a(n)ne to beholdende . vor achtehundert marc / Rozstoker pē(n)ninge . vn(de) twintich marc der zuluen munte . de mý vn(de) mýme wýue gheseken . vorben(omet) . mit reden telleden pe(n)ningen / to dancke wol bered sint . . Alle desse vorescreue(n) stücke . vn(de) en yewelk bý syk loue ik her Mathias axekow Ridder van mýner . vn(de) / geseken mýnes wýues . weghene mit her hinric katzowen . vn(de) hans katzowen . eren broderen . vn(de) mit her werner axekowen myne(n) vadere . vn(de) vsen rechten eruen . hern wýnold Baggelen . vn(de) sýnen rechten eruen . vorben(omet) . stede . vast . vn(de) vnbrekelk to holdende sunder / hulperede vn(de) argelist . To bekantnisse . vn(de) vulbord desser dinge . hebbe wy vorbenomden vse ingezegele . vn(de) to witlicheyte mit den / Ingezegelen der Erbarn ma(n)ne . her Johannis van der aa . her lodewých Crusen vn(de) her hinric witten Borgermest(er)e to Rozstok vor / dessen breff mit wýllen . vn(de) wýtscop gehenget . De geuen vn(de) screuen is to Rozstok na godes bord drútteýnhundert iar jn deme / výf vn(de) negentigesten iare des negesten dages na sunte mertens dage des hilgen byscopes /